

# מיכה

7 6 5 4 3 2 1

## הפרק 1

**ד** בר יהוה אשר היה אל מיכה המרשתי בימי יותם אחז יחזקיה מלכי יהודה אשר חזה על שמרון וירושלם

<sup>2</sup>שמעו עמים כלם הקשיבי ארץ ומלאה ויהי אדני יהוה בכם לעד אדני מהיכל קדשו

<sup>3</sup>כי הנה יהוה יצא ממקומו וירד ודרך על במותי ארץ

<sup>4</sup>ונמסו ההרים תחתיו והעמקים יתבקעו כדונג מפני האש כמים מגרים במורד:

<sup>5</sup>בפשע יעקב כל זאת ובחטאות בית ישראל מי פשע יעקב הלוא שמרון ומי במות יהודה הלוא ירושלם

<sup>6</sup>ושמתי שמרון לעי השדה למטעי כרם והגרתי לגי אבניה ויסדיה אגלה

<sup>7</sup>וכל פסיליה יכתו וכל אתנניה ישרפו באש וכל עצביה אשים שממה כי מאתנן זונה קבצה ועד אתנן זונה ישובו

<sup>8</sup>על זאת אספדה ואילילה אילכה שילל וערום אעשה מספד כתנים ואבל כבנות יענה

<sup>9</sup>כי אנושה מכותיה כי באה עד יהודה נגע עד שער עמי עד ירושלם

<sup>10</sup>בגת אל תגידו בכו אל תבכו בבית לעפרה עפר התפלשתי:

<sup>11</sup>עברי לכם יושבת שפיר עריה בשת לא יצאה יושבת צאן מספד בית האצל יקח מכם עמדתו

<sup>12</sup>כי חלה לטוב יושבת מרות כי ירד רע מאת יהוה לשער ירושלם

<sup>13</sup>רתם המרכבה לרכש יושבת לכיש ראשית חטאת היא לבת ציון כי בך נמצאו פשעי ישראל

<sup>14</sup>לכן תתני שלוחים על מורשת גת בתי אכזיב לאכזב למלכי ישראל

<sup>15</sup>עד הירש אבי לך יושבת מרשה עד עדלם יבוא כבוד ישראל

<sup>16</sup>קרחי וגזי על בני תענוגך הרחבי קרחתך כנשר כי גלו ממך

## הפרק 2

**ה**וי חשבי און ופעלי רע על משכבותם באור הבקר יעשוה כי יש לאל ידם

<sup>2</sup>וחמדו שדות וגזלו ובתים ונשאו ועשקו גבר וביתו ואיש ונחלתו

<sup>3</sup>לכן כה אמר יהוה הנני חשב על המשפחה הזאת רעה אשר לא תמישו משם צוארתיכם ולא תלכו רומה כי עת רעה היא

<sup>4</sup>ביום ההוא ישא עליכם משל ונהה נהי נהיה אמר שדוד נשדנו חלק עמי ימיר איך ימיש לי לשווב שדינו יחלק

<sup>5</sup>לכן לא יהיה לך משליך חבל בגורל בקהל יהוה

<sup>6</sup>אל תטפו יטיפון לא יטפו לאלה לא יסג כלמות

<sup>7</sup>האמור בית יעקב הקצר רוח יהוה אם אלה מעלליו הלוא דברי ייטיבו עם הישר הולך:

<sup>8</sup>ואתמול עמי לאויב יקומם ממול שלמה אדר תפשטון מעברים בטח שובי מלחמה

<sup>9</sup>נשי עמי תגרשון מבית תענגיה מעל עלליה תקחו הדרי לעולם  
<sup>10</sup>קומו ולכו כי לא זאת המנוחה בעבור טמאה תחבל וחבל נמרץ  
<sup>11</sup>לו איש הלך רוח ושקר כזב אטף לך ליין ולשכר והיה מטיף העם הזה  
<sup>12</sup>אסף אסף יעקב כלך קבץ אקבץ שארית ישראל יחד אשימנו כצאן בצרה כעדר בתוך הדברו  
תהימנה מאדם  
<sup>13</sup>עלה הפרץ לפניהם פרצו ויעברו שער ויצאו בו ויעבר מלכם לפניהם ויהוה בראשם

### הפרק 3

**אמר שמעו נא ראשי יעקב וקציני בית ישראל הלוא לכם לדעת את המשפט**  
<sup>2</sup>שנאי טוב ואהבי רעה גזלי עורם מעליהם ושארם מעל עצמותם  
<sup>3</sup>ואשר אכלו שאר עמי ועורם מעליהם הפשיטו ואת עצמתיים פצחו ופרשו כאשר בסיר וכבשר  
בתוך קלחת  
<sup>4</sup>אז יזעקו אל יהוה ולא יענה אותם ויסתר פניו מהם בעת ההיא כאשר הרעו מעלליהם  
<sup>5</sup>כה אמר יהוה על הנביאים המתעים את עמי הנשכים בשניהם וקראו שלום ואשר לא יתן על פיהם  
וקדשו עליו מלחמה  
<sup>6</sup>לכן לילה לכם מחזון וחשכה לכם מקסם ובאה השמש על הנביאים וקדר עליהם היום  
<sup>7</sup>ובשו החזים וחפרו הקסמים ועטו על שפם כלם כי אין מענה אלהים  
<sup>8</sup>ואולם אנכי מלאתי כח את רוח יהוה ומשפט וגבורה להגיד ליעקב פשעו ולישראל חטאתו  
<sup>9</sup>שמעו נא זאת ראשי בית יעקב וקציני בית ישראל המתעבים משפט ואת כל הישרה יעקשו  
<sup>10</sup>בנה ציון בדמים וירושלם בעולה  
<sup>11</sup>ראשיה בשחד ישפטו וכהניה במחיר יורו ונביאיה בכסף יקסמו ועל יהוה ישענו לאמר הלוא יהוה  
בקרבנו לא תבוא עלינו רעה  
<sup>12</sup>לכן בגללכם ציון שדה תחרש וירושלם עיין תהיה והר הבית לבמות יער

### הפרק 4

**היה באחרית הימים יהיה הר בית יהוה נכון בראש ההרים ונשא הוא מגבעות ונהרו עליו עמים**  
<sup>2</sup>והלכו גוים רבים ואמרו לכו ונעלה אל הר יהוה ואל בית אלהי יעקב ויורנו מדרכיו ונלכה בארחתיו כי  
מציון תצא תורה ודבר יהוה מירושלם  
<sup>3</sup>ושפט בין עמים רבים והוכיח לגוים עצמים עד רחוק וכתתו חרבתיים לאתים וחניתתיים למזמרות  
לא ישאו גוי אל גוי חרב ולא ילמדון עוד מלחמה  
<sup>4</sup>וישבו איש תחת גפנו ותחת תאנתו ואין מחריד כי פי יהוה צבאות דבר  
<sup>5</sup>כי כל העמים ילכו איש בשם אלהיו ואנחנו נלך בשם יהוה אלהינו לעולם ועד  
<sup>6</sup>ביום ההוא נאם יהוה אספה הצלעה והנדחה אקבצה ואשר הרעתי  
<sup>7</sup>ושמתי את הצלעה לשארית והנהלאה לגוי עצום ומלך יהוה עליהם בהר ציון מעתה ועד עולם  
<sup>8</sup>ואתה מגדל עדר עפל בת ציון עדיך תאתה ובאה הממשלה הראשנה ממלכת לבת ירושלם  
<sup>9</sup>עתה למה תריעי רע המלך אין בך אם יועצך אבד כי החזיקך חיל כילודה  
<sup>10</sup>חולי וגחי בת ציון כילודה כי עתה תצאי מקריה ושכנת בשדה ובאת עד בבל שם תנצלי שם יגאלך  
יהוה מכף איבויך  
<sup>11</sup>ועתה נאספו עליך גוים רבים האמרים תחנף ותחז בציון עינינו  
<sup>12</sup>והמה לא ידעו מחשבות יהוה ולא הבינו עצתו כי קבצם כעמיר גרנה  
<sup>13</sup>קומי ודושי בת ציון כי קרנך אשים ברזל ופרסתך אשים נחושה והדקות עמים רבים והחרמתי  
ליהוה בצעם וחילם לאדון כל הארץ

## הפרק 5

**ע**תה תתגדדי בת גדוד מצור שם עלינו בשבט יכו על הלחי את שפט ישראל<sup>2</sup> ואתה בית לחם אפרתה צעיר להיות באלפי יהודה ממך לי יצא להיות מושל בישראל ומוצאתיו מקדם מימי עולם<sup>3</sup> לכן יתנם עד עת יולדה ילדה ויתר אחיו ישובון על בני ישראל<sup>4</sup> ועמד ורעה בעז יהוה בגאון שם יהוה אלהיו וישבו כי עתה יגדל עד אפסי ארץ<sup>5</sup> והיה זה שלום אשור כי יבוא בארצנו וכי ידרך בארמנתינו והקמנו עליו שבעה רעים ושמנה נסיכי אדם<sup>6</sup> ורעו את ארץ אשור בחרב ואת ארץ נמרד בפתחיה והציל מאשור כי יבוא בארצנו וכי ידרך בגבולנו<sup>7</sup> והיה שארית יעקב בקרב עמים רבים כטל מאת יהוה כרביבים עלי עשב אשר לא יקוה לאיש ולא ייחל לבני אדם<sup>8</sup> והיה שארית יעקב בגוים בקרב עמים רבים כאריה בבהמות יער ככפיר בעדרי צאן אשר אם עבר ורמס וטרף ואין מציל<sup>9</sup> תרם ירך על צריך וכל איביך יכרתו<sup>10</sup> והיה ביום ההוא נאם יהוה והכרתי סוסך מקרבך והאבדתי מרכבתך<sup>11</sup> והכרתי ערי ארצך והרסתי כל מבצריך<sup>12</sup> והכרתי כשפים מידך ומעוננים לא יהיו לך<sup>13</sup> והכרתי פסיליך ומצבותיך מקרבך ולא תשתחוה עוד למעשה ידיך<sup>14</sup> ונתשתי אשיריך מקרבך והשמדתי עריך<sup>15</sup> ועשיתי באף ובחמה נקם את הגוים אשר לא שמעו

## הפרק 6

**ש**מעו נא את אשר יהוה אמר קום ריב את ההרים ותשמענה הגבעות קולך<sup>2</sup> שמעו הרים את ריב יהוה והאתנים מסדי ארץ כי ריב ליהוה עם עמו ועם ישראל יתוכח<sup>3</sup> עמי מה עשיתי לך ומה הלאתיך ענה ב!<sup>4</sup> כי העלתיך מארץ מצרים ומבית עבדים פדיתיך ואשלח לפניך את משה אהרן ומרים<sup>5</sup> עמי זכר נא מה יעץ בלק מלך מואב ומה ענה אותו בלעם בן בעור מן השטים עד הגלגל למען דעת צדקות יהוה<sup>6</sup> במה אקדם יהוה אכף לאלהי מרום האקדמנו בעולות בעגלים בני שנה<sup>7</sup> הירצה יהוה באלפי אילים ברבבות נחלי שמן האתן בכורי פשעי פרי בטני חטאת נפשי<sup>8</sup> הגיד לך אדם מה טוב ומה יהוה דורש ממך כי אם עשות משפט ואהבת חסד והצנע לכת עם אלהיך<sup>9</sup> קול יהוה לעיר יקרא ותושיה יראה שמך שמעו מטה ומי יעדה<sup>10</sup> עוד האש בית רשע אצרות רשע ואיפת רזון זעומה<sup>11</sup> האזכה במאזני רשע ובכיס אבני מרמה<sup>12</sup> אשר עשיריה מלאו חמס וישביה דברו שקר ולשונם רמיה בפיהם<sup>13</sup> וגם אני החליתי הכותך השמם על חטאתך<sup>14</sup> אתה תאכל ולא תשבע וישחך בקרבך ותסג ולא תפליט ואשר תפלט לחרב אתן<sup>15</sup> אתה תזרע ולא תקצור אתה תדרך זית ולא תסוך שמן ותירוש ולא תשתה יין<sup>16</sup> וישתמר חקות עמרי וכל מעשה בית אחאב ותלכו במעצותם למען תתי אתך לשמה וישביה לשרקה וחרפת עמי תשאו

**א**ללי לי כי הייתי כאספי קיץ כעללת בציר אין אשכול לאכול בכורה אותה נפש!  
<sup>2</sup>אבד חסיד מן הארץ וישר באדם אין כלם לדמים יארבו איש את אחיהו יצודו חרם  
<sup>3</sup>על הרע כפים להיטיב השר שאל והשפט בשלום והגדול דבר הות נפשו הוא ויעבתו  
<sup>4</sup>טובם כחדק ישר ממסוכה יום מצפיך פקדתך באה עתה תהיה מבוכתם  
<sup>5</sup>אל תאמינו ברע אל תבטחו באלוף משכבת חיקך שמר פתחי פיך  
<sup>6</sup>כי בן מנבל אב בת קמה באמה כלה בחמתה איבי איש אנשי ביתו  
<sup>7</sup>ואני ביהוה אצפה אוחילה לאלהי ישעי ישמעני אלהי!  
<sup>8</sup>אל תשמחי איבתי לי כי נפלתי קמתי כי אשב בחשך יהוה אור לי!  
<sup>9</sup>זעף יהוה אשא כי חטאתי לו עד אשר יריב ריבי ועשה משפטי יוציאני לאור אראה בצדקתו  
<sup>10</sup>ותרא איבתי ותכסה בושה האמרה אלי איו יהוה אלהיך עיני תראינה בה עתה תהיה למרמס כטיט חוצות  
<sup>11</sup>יום לבנות גדריך יום ההוא ירחק חק  
<sup>12</sup>יום הוא ועדיך יבוא למני אשור וערי מצור ולמני מצור ועד נהר וים מים והר ההר  
<sup>13</sup>והיתה הארץ לשממה על ישביה מפרי מעלליהם  
<sup>14</sup>רעה עמך בשבטך צאן נחלתך שכני לבדד יער בתוך כרמל ירעו בשן וגלעד כימי עולם  
<sup>15</sup>כימי צאתך מארץ מצרים אראנו נפלאות  
<sup>16</sup>יראו גוים ויבשו מכל גבורתם ישימו יד על פה אזניהם תחרשנה  
<sup>17</sup>ילחכו עפר כנחש כזחלי ארץ ירגזו ממסגרתיהם אל יהוה אלהינו יפחדו ויראו ממך  
<sup>18</sup>מי אל כמוך נשא עון ועבר על פשע לשארית נחלתו לא החזיק לעד אפו כי חפץ חסד הוא  
<sup>19</sup>ישוב ירחמנו יכבש עונתינו ותשליך במצלות ים כל חטאותם  
<sup>20</sup>תתן אמת ליעקב חסד לאברהם אשר נשבעת לאבותינו מימי קדם